


CONTUS DE FORREDDA



SA BABBAIECA – S'ANDARA DE SA MORTI



As pentzau mai a s'importu de is ajajus? Chi puru funt bècius e fadiaus, faint unu niaxi de cosas fintzas po is prus giòvunus: agiudant is nebodis, e ddis contant stòrias de su connotu po imparai sa vida. Ma nci fiat unu tempus chi si crediat chi is bècius non serbiant a nudda.

Nci fiat una borta una bidda me in is montis de Gàiru anca sa genti biviat trancuilla e in paxi.

Is òminis pasciant is crabas e is brebeis, àterus fiant messajus; is fèminas sighiant is pipius, cosiant, tessiant cun su trebaxu o fadiant scarteddus.

Una borta perou fiat lòmpia una carestia mala longa annus medas, e sa cosa de papai fiat pagu e non fiat bastanti po totus: su màndigu fiat sceti po is chi trabballànt e po is pipius. Is fèminas podiant sighiri a trabballai in domu candu fiant bècias puru, is òminis invècias non podiant

prus sighiri is brebeis o marrai sa terra. Duncas, is chi non podiant trabballai fiant sceti una buca in prus de donai a papai, unu pesu po sa comunidadi. Is giòvunus chi biviant cun pagu, iant decìdiu chi s'ùnica manera po sarvai sa comunidadi fiat de si libberai de is bècius chi non podiant prus fai nudda. Aici iant pentzau de fai passai is bècius a s'àtera vida sacrificendi-ddus a Cronos, su Deus de su Tempus.

Ddoi aiat un'andara chi pesàt me in is montis fintzas a una forra arta arta; in cussa andara is fillus acumpangiànt is babbus, portendi-ddus a palas candu non podiant prus camminai, e una borta ingunis ddis donànt de bufai una mata chi ddi narànt "erba sardònica" chi ddus stontonàt e ddis fadiat scaresci totu, chini fiant o chini non fiant, poita fiant o non fiant ingunis. Custu improddu de bufai ddus fadiat stai mali meda, ddis tiràt is pabaristas,

is ogus si fadiant mannus e trotus, sa buca manna manna chi parriat chi fessint arriendi, invècias fiant a tzèrrius malus. "Uaaaaaaargh!" Aici, po fai acabbai custu dolori, is fillus spingiant is babbus a bàsciu, farendi-ddus arrui de sa forra.

A cussa andara ddi narànt sa babbaieca, ca babbai bolit nai babbu, o Fintzas ajaju, e eca bolit naiswea bessida.

Sa bessida de is babbus de sa vida in custa manera... ita cosa lègia eh?

Eja, fiat una cosa lègia ma chi serbiat po si sarvai, e fiat andada a innantis aici po sèculos. Fintzas a candu cussa traditzioni mala fiat acabbada, gràtzias a unu giòvanu coragiosu e a su babbu suu, bèciu ma abbistu, chi ddi narànt Bustianu.

Bustianu fiat diventau bèciu chentza de nimancu si nd'acatai. Iat sèmpiri fatu su maistu de linna, e ndi fiat stètiu prexau. Teniat unu fillu e dd'iat imparau a imperai is ainas de su

laboratori: trapanus, piallas, marteddus, e totu su chi serbiat po fai guardarrobbas, letus, càscias e àteras cosas po sa domu, po sa famìllia e po is pipius.

Bustianu, difatis, nc'arrennesciat a fabbricai calisisiat cosa de linna, ma sa cosa chi ddi praxiat de prus fiat a fai giogus po is pipius: badrunfulas, cuaddus de canna, barrallicus e is aferradrooxus po sa funi po sartai. Eja, sa funi po sartai, chini si dd'arregordat?

Is pipius ddu sighiant sèmpiri e andànt in sa butega sua po ddi peri calincunu arregallu, Fintzas calincunu arrogheddu de linna chi podiat diventai unu pilloneddu chi bolàt. Non naràt mai ca nono, ddi praxiat a giogai, e ddi praxiant is pipius ca s'intendiat unu pipiu issu puru.

Ma is annus passànt, e Bustianu fiat imbeciau, is pipius fiant mannus e su fillu iat inghitza a trabballai in sa

butega de su babbu. A Bustianu ddi tremaint is manus nuosas e non podiat prus trabbalai sa linna, no arrennesciat prus a fai guardarrobbas o àteras ainas utilosas, ma circàt a ònnia manera de sighiri a trabbalai e fai gioghiteddus po is pipius, ca sciat ita dd'abetàt: sa babbaieca. Circàt de sighiri a poderai e stesial prus chi podiat sa bia de sa morti. Teniat cuatru nebodeddus chi castiàt ònnia mangianu candu su babbu e sa mamma trabballànt; a merì, candu non depiat fai s'ajaju, abellu abellu agiudendi-sì cun unu baculeddu de olia (matzucu) andàt in sa pratixedda de sa bidda e si setziat a giogai cun is pipius de is àteras famillias, chi dd'abetànt po si spassiai cun issu. Eja, fiat su machillotu de sa bidda, e s'arrisu suu s'intendiat atesu, e totus ddi boliant beni. Calincuna borta si nci drommiat in s'interis chi fiat arreindi, ma a is pipius non ndi nd'importàt nudda, non

lsciant e non pentzànt chi cussu prèxiu no iat a essi stètiu po sèmpiri.

Is òminis de sa bidda perou inghitzànt a si domandai: poita Bustianu est ancora innoi? No est giustu! Est una buca in prus de donai a papai e est arribbada s'ora sua:

Su fillu, a dolu mannu, si fiat dèpiu decidi, e in una noti de luna prena fiat andau a scidai su babbu.

“Babbu, est ora!” A s’inghitzu Bustianu no iat comprèndiu, ma apustis unu pagu, iat nau tristu: “andat beni”.

Fiant bessius de sa bidda cua cua, aici nemus ddus podiat biri e nemmus iat ai prantu, pruschetotu is nebodeddus e is àterus pipius. Ddis iant a ai nau chi Bustianu si fiat mortu in su sonnu.

Fiant pesaus in s'andara de sa babbaieca. Sa luna fiat prena e fadiat aici luxi chi parriat chi fessit a de dì. A metadi de s'andara, Bustianu, fadiau po sa pesada, iat domandau a su fillu chi si podiat pasiai unu pagheddu

setzendi-sì in una arroca. Su fillu dd'iat lassau fai, pentzendi a candu ddi podiat donai s'erba de bufai. Ma Bustianu totinduna iat inghitzau a contai de candu fiat giòvunu e iat acumpangiau a su babbu ingunis, si fiant pasiaus pròpriu in cussa arroca, dd'iat donau s'erba de bufai, e dd'iat spintu a bàsciu de sa forra, po ddu fai smiti de sunfriri.

Intzandus su fillu iat cumentzau a pentzai a candu iat essi stètiu bèciu issu puru, e su fillu dd'iat a ai scavuau de su monti. E si fiat postu a prangi. Non boliat bociri su babbu in cussa manera, e is pipius e is àterus chi ddi boliant beni, iant a essi stètius tristus meda. Babbu e fillu si fiant imprassaus. E Bustianu iat nau: "fillu miu, is cosas chi puru funt antigas, si podint mudai candu non funt giustas. Poita non fadeus una brulla a totus? Tui torra a bidda, e deu mi cuu in calincuna gruta innoi in susu. E abbarru cuau fintzas a candu tui no arrennescis a cumbinci a

totus de dd'acabbai cun custa traditzioni aici lègia. Ita ndi naras?". E aici iant fatu. Bustianu si fiat cuau in una gruta. In s'interis, su fillu iat contau a is àterus comentí si fiat mortu su babbu, cun totus is detàlllius prus crudelis e lègius. "D'd'apu donau cuss'erba de bufai e issu at inghitzau luegus a s'intendiri malli, teniat gana mala. Apustis sa buca s'est fata totu trota e iat cumentzau a arri. E arriat e arriat, e deu pentzaa chi fessit brullendi, ca issu fiat aici, brulleri. Ma issu fadiat una faci lègia, e si poderàt sa brenti. Intzandus d'apu pigau po ddu spingi in sa forra, ma issu non boliat e si nc'est fuiu. D'd'apu sighiu e a s'acabu est arrutu in sa forra, sighendi a arri e frastimmendi-mì.

Is òminis ascurtànt in silèntziu, pentzendi a candu iant a essi deventaus bècius issus puru, e iant a ai dèpiu fai cussa fini. Is pipius prangiant e totus fiant tristus, ma non si podiat fai prus nudda, Bustianu si fiat mortu, e cussa

fiat sa traditzioni, tocàt a dd'arrispetai.

Apustis calincuna dii, un'òmini cun un sacu mannu me in is palas e una barba longa e bianca, fiat intrau in sa bidda atzopiendi. Iat cumentzau a arregallai giochiteddus de linna a totus, mannus e pitius. Nemmus dd'iat torrau a connosci fintzas a candu sa netixedda dd'iat castiau beni is ogus e is manus de bèciu; apustis dd'iat tirau sa barba finta fata cun lana de brebei, e Bustianu si fiat postu a arriri. Su prèxiu! Totus dd'iant imprassau e non dd'iant prus lassau andai.

Aici is òminis de Gàiru iant decìdiu de dd'acabbai cun cussa traditzioni lègia. De imoi a innantis is òminis bècius iant a essi abarraus cun is famìllias insoru, nemus ddus iat a ai prus portaus a sa babbaieca.

"Biis, sa traditzioni tenit unu importu mannu" iat nau ajaju a s'acabbu de su contu "ma tocat a tenni puru su

coràgiu de mudai is cosas! Oghinou fiaus ancora a su tempus de is nuraxesus, e is ajajus no iant a tenni nisciunu importu".

Apustis iat pigau unu sacu e mi dd'iat donau: fiat prenu de giochiteddus de linna: badrunfulas, barrallicus, bambuleddas e àterus animaleddus. Dd'apu castiau e issu s'est postu a arriri. Ddus iat fatus po mimi, cun is manus mannas e frungidas, chi contant una vida.



LUXIA ARRABIOSA



Biviat in Sardigna una coga chi si naràt Luxia Arrabiosa.

Calincunu narat chi fiat manna manna, calincunu àteru narat chi fiat pitichedda pitichedda, comenti una jana.

Issa fiat poderosa, arrica e ingordigosa.

Biviat in una gruta manna, e aintru ddoi teniat ònnia cosa: cosa de papai e de bufai, prendas de oru e de prata.

A de dì Luxia dromiat e a de noti abarràt abilla, si setziat in s'oru de sa gruta aici chi nemus podiat intrai a ndi furai is cosas suas.

E candu issa dromiat, su fusu acogau cosa sua agordat sa domu: chi calincunu si acostàt a sa gruta, su fusu inghitzàt a trotolai fintzas chi sa meri si ndi scidàt.

Una borta, candu s'ierru fiat longu e lègiu, i sartus fiant cungelaus e non

cresciat nudda.

In beranu non ddoi fiat trigu e in s'istadi nisciunu ddu podiat messai.

Sceti Luxia Arrabiosa, chi fiat arrica meda, no iat sunfriu su fàmini.

Issa fiat aici arrica chi podiat agiudai sa genti, ma fiat aici ingordigosa chi no iat arregalau nudda a nemus, nimancu unu granu de trigu.

Una dì, una pariga de òminis iant detzìdiu de furai calincuna cosa a sa coga bècia.

Fiant andaus a chitzi, ca sciant chi issa a de noti fiat abilla ma a de dì fiat dromida.

Candu si fiant acostaus a s'oru de sa gruta, su fusu iat inghitzau a trotolai de pressi e a fai unu sonu de bentu insurdadori.

Luegus Luxia Arrabiosa si ndi fiat scidada e si ndi fiat pesada.

Is òminis si ndi fiant atzicaus e si fiant

fuís a lestru, unu perou iat
imbrunchiau e nci fiat arrutu a terra.

Luxia ddiat nau a tzèrrius: "imou ti
ddu fatzu biri deu ita bolit nai a mi ndi
furai is cosas mias!"

Su fusu iat torrau a trotolai fadendu
sonu meda, poita non podiat sunfriri
is tzèrrius de cuss'òmini.


Si ndi fiat pesau a celu e a pustis si
nci fiat ghetau in su forru, e si fiat
abbruxau.

Candu Luxia Arrabiosa iat biu su fusu
suum abbruxendi, disisperada, si ndi fiat
tirada is pilus de conca.

"Cumenti apu a fai a filai imou? Chini
at a castiai sa gruta mia a de dì?"
naràt tzerriendu.

De cussu momentu Luxia Arrabiosa no
iat dromiu prus, ni a de noti ni a de
dì, e fiat diventada una cixara pitia
pitia, e andàt arreu chenza de si fai biri
intra is arrocas e is moris de sa gruta
manna cosa sua.

Candu intendis una cixara chi cantat,
non ti acostis: est Luxia Arrabiosa chi
prangit po su fusu cosa sua, chi
agordàt sa grutas e is prendas de oru
e de prata.



MARIA FARRANCA

Meda tempus a oi, non si sciit abini e non si sciit candu, nci fiat una pipia bella meda, cun is pilus brundus e longus longus, chi si naràt Lucilla.

Biviat in una biddixedda pitchedda de sa Sardigna, prena de padentis e domixeddas bellixeddas e limpiadas, e in ònnia domu nci fiat una funtana.

Totus is chi biviant in sa bidda ddi narànt a Lucilla: "Ita piciochedda bellixedda, ita bellu arrisu, e ita ogus drucis".

Lucilla fiat diventada bantaxeda, e fintzas unu pagheddu mali bòfia. Abarràt totu sa di' castiendi-sì in su sprigu, me is imbirdus e in totu is logusanca fadiat a si castiai. "Ita bella chi seu, tropu bella, bellixedda bellixedda".

Ònnia di' Lucilla pigàt sa cracida po dda preni de àcua.

Una dì, candu fiat portendu a susu sa cracida, si fiat incarada unu pagheddu in sa funtana, e iat biu sa cara sua in s'acua!

"Ita bellu! Ita bella chi seu!".

De sa dì, ònnia borta si incaràt unu pagheddu de prus po castiai sa bellesa cosa sua a intru de sa funtana.

Una dì, su fradixeddu Marcu, iat inghitzau a dda pigai in giru: "Lucilla si castiat in su sprigu! Lucilla si castiat in su sprigu!"


Totinduna, s'àcua iat inghitzau a ndi pesai, e a buddiri, e ndi fiat bessiu de sa funtana unu bratzu cun in ungas longas longas cumenti is farrancas de is puddas chi iat pigau Lucilla po sa camisedda, e apustis ndi fiat bessida una cara manna manna e birdi, e is pilus fiant totus arrufaus de su colori de muscu. Luegus Lucilla fiat sparèssia, papada de sa funtana.

Fiat stètia Maria Farranca. Maria Fiat una pipia bellixedda meda, a trassa de Lucilla. A issa puru sa genti de sa bidda ddi narànt sèmpiri" Ita bella piciochedda, ita bellu arrisu, ita ogus drucis". Issa puru abarràt totu sa dì castiendi-si-dda in su sprigu, in (d)ònbia logu, fintzas in sa funtana.

Una dì si nci fiat incarada tropu, e nci fiat arruta. Ma non si fiat morta, fiat abarrada arrimmada a intru de totus is funtanias. Cun sa cara birdi, totu annarbada, prena de muscu. Cun i bratzus longus longus e is ungas cumenti is farrancas de is puddas. E is pilus? Is pilus fiant cumenti is anguiddas, chi si moviant sèmpiri asuba de sa cara, e dda fadiant ancora prus lègia.

Eis biu ita acuntessit candu calincunu pipiu s'incarat tropu in sa funtana? At a essi pigau de Maria Farranca!

De cussa dì', totus is mamas, is tzias e is ajajas arregordant sèmpri a is pipius de abarai atesu e non si acostai mai a is funtanias.



SETI BARRITAS PO SETI PIPUS

Boing, boing, boing!

Fiat a su mancu de unu cuartu de ora chi Giacomeddu intendiat calincuna cosa sartendu in su stògumu. Comenti chi calincunu fessit sartendu in sa brenti sua, a trassa de unu mantalafu. Comenti fadiant issu e su fradi Gustavu in su letu de mama su sàbudu a merì, candu issa bessiat po andai a baddai.

Boing, boing, boing!

“Ojamomia!” si naràt candu fiat ancora dromendi “cussa patata frita fiat diaderus tropu, e puru su paninu cun hamburgher, kechap e maionesi, e su gelau de ciuculati, fortzis apu papau tropu...”.

Prus nci pentzàt e prus stadiat mali.

De aintru, chi puru fiat ancora dromiu, una boxixedda ddi naràt ca depiat fai calincuna cosa. E ita podiat fai? E si fiat postu a tzerriai: “Ojamomia, ojamomia, cumenti fatzu

imoi?” E iat tzerriau aici meda ca si ndi fiat scidau.

Iat abertu is ogus e ...

Boing, boing, boing!

Cosa de no crei!

Asuba de sa brenti sua ddoi fiat unu omineddu pitcheddu e grassiteddu, artu comenti unu bassotu, su callellodeddu, cun duus ogus allergus comenti cussus de unu topixeddu de su sartu, e sa braba niedda a punta, comenti cussa de is tiaus de s’inferru. E custu omineddu sartada, sartada e torrada a sartai asuba de sa brenti sua, arriendu a scracalius, comenti chi fessit una cosa normali: atru chi patata frita e gelau!

Giacomeddu fiat spantau meda. Iat acabbau de tzerriai e fiat abarrai a buca aberta castiendi a s’omineddu. Portàt una conca de mortu apicada a su tzugu, duas crupitas a punta, tres

butonis luxentis in sa brenti, cuatru bertuleddas apicadas a su cintu prenas de dinai, cìncui puntas in su colletu de sa camisa, ses aneddus de oru (tres in ònnia didu) e seti, eja, pròpiu seti barritas in conca!

Giacomeddu no nci podiat crei: no iat mai biu totus cussus capeddu! Fiant tropu bellus! Ma non si ddu nau comenti fiant, si ddus depeis figurai bosàterus comenti fiant!

Giacomeddu cussas barritas ddas boliat meda, poita ca fiat s'ùrtimu de seti fillus, e in sa biddaanca biviant nci fiat frius meda, e dinai pagu, e duncas in cussa domu nci fiant seti concas de pipius chena de nisciunu capeddu.

“Eja, sarta sarta, ma comenti ti naras, ca non mi dd’arregordu?”

“Eh non ti dd’arregordas poita non ti dd’apu nau! A ònnia manera, deu seu corbàciu su pundàciu. Ah, gràtzias po sa brenti tua aici moddi, est bellu meda sartai innoi, non si nd’agatant meda de

brentis de aici!”

“Ojamomia, unu pundàciu” iat pentzau in silènziu Giacomeddu. “Genti lègia lègia, e mala, chi fai benni bisus malus! No, non ddi potzu permiti de abarrai in sa brenti cosa mia, depu fai calincuna cosa!”

“Ita se pentzendi, pipiu?” iat nau su pundàciu.

“Eh, seu pentzendi ca chi mi papu una cingoma, una big babol, as a pòdiri sartai ancora mellus! Ddu scis comenti est una big babol?”

“Ita, ita tiau ses narendi????”

“Una big babol, una de cussas gomas bellas meda, chi costant meda e chi mi papu cua cua de mama, ca issa non bolit!”

“Non ddas connòsci! Mai intèndias!” lat nau su pundàciu. “Ma mi parit una cosa bella meda, abini funt custas cingomas?”
E sighiat a sartai!

"Chi mi ndi fais pesai de su letu, pigu una big babol chi apu cuau in su zainu, aici as a provai sa brenti prus spassosa de totu sa Sardigna"!

"Ah, beni meda, bravu pipiu: ti donu sceti tres segundus po ti ndi pesai de su letu, ti papai sa big babol e ti torrai a crocai innoi! Ajo decidi-tidda, de pressi, là ca seu castiendu-ti!"

"Andat beni!" torrat sceda Giacomeddu, ca iat gai decidiu ita fai. Ndi fiat calau de su letu e, cun sa lestresa de una mantinca, ndi iat furau su primu capeddu de su pundàciu, fadendi arrui a terra totu is àterus! Apustis, iat pigau s'orinali chi teniat acantu su letu, e si dd'iat acovecau a conca!

"Lei, o su rei, custa est sa corona cosa tua!"

"Ahhhhh, ses una mantinica lègia e cadotza, maraditu! Maraditu" iat tzerriau su pundàciu! E a pustis si fiat postu a prangi meda!

Eja, poita sa cosa chi is puntàcius timint de prus, est a s'imburtai, e issu fiat totu burtu de piciàciu! Putzidda! A pustis chi iat prantu po mes'ora, su pundàciu iat nau:

"Andat beni, piciocheddu, as bintu tui! Nara-mì ita bolis"

"Bollu chi ti ndi andist atesu, Baitinci! Non ti bollu biri mai prus! E sigumenti seu unu piciocheddu bravu, ti pigu sceti is barritas e is sachiteddus de dinai, is aneddus ti ddus podis tenni, funt lègius, non ddus bollu!" Adiosu pundàciu!

Apustis, Giacomeddu iat pigau is seti capeddus e iat tzerriau totus is fradixeddus: Gaspare, Gastoneddu, Gedeone, Giòrgiu, Giròlamu e Gustavu (eja, sa mama ddi praxiant is nòminis chi inghitzant cun sa G!).

Ònniunu de issus iat sceberau unu capeddu, e su dinai dd'iat donau a sa mama, ca sa famillia ndi teniat abbisòngiu.



SA MUSCA MACEDDA

“Ddu scis chi est mellusa bivi pòberu e in saludi, invecias de circai scussòrgius e arriscai de perdi sa vida? Non nci creis?” Aici mi iat nau s’ajaju miu unu merì. Deu non scia ita dd’arrespondi, fiat una domanda dificili meda. Issu, po mi fai comprendi, m’iat contau una storia chi fadiat a timì.

Tempus fait meda, si contat chi in Sardigna biviat una musca lègia lègia, manna cantu una brebei, cun una conca manna manna e is ogus arrùbius in foras, un punctioni mannu e is alas poderosas, chi bolàt in scussurra e su sonu chi fadiat, BZZZZZ, ddu podiast intendi fintzas a atesu meda. Fiat perigulosa, ca sa puntura sua fadiat benni sa callentura arta meda, e si podiat fintzas morri.

Nemus sciat ni de abini ni comenti fiat arribada in s’isula nostra, scieus scieti chi ddi narant sa musca macedda poita

fadiat unu macellu, iat gai scancellau totu sa popolatzioni de sa Sardigna. Sceti is sardus antigus chi iant fabricau is nuraxis – genti scadraluta e arrica meda – finat arrennèscius a binci cussu babaloti lègiu lègiu.

Depeis pentzai chi po amparai is scussòrgius insoru de is furonis, ddus poniant aintru de is carradas chi poniant me in is nuraxis; ma acanta de is carradas cun s’oru e sa prata ndi poniant àteras cun a intru... intzertai ita? Eja, pròprietu cussa, nci poniant àteras carradas prenas de musca macedda. Ita cosa lègia meda, berus? Po cussu nemus iat mai circau de ndi furai is scussòrgius chi fiant cuaus in totu sa Sardigna. Chi iant a ai abertu sa carrada sballiada, iant a ai pòtziu fai unu macellu in totu sa Sardigna.

Una dì, perou, un’òmini de sa bidda de Lodoverre, chi pentzàt chi sa stòria de

sa musca macedda fessit una paristòria, iat provau de totu po diventai arricu. Iat bisitau is nuraxis e in unu, su Nuraxi de Monti de Jana, iat agatau s'arrebustu anca ddoi fiant is carradas. Si fiat firmau unu pagheddu a pentzai chi sa stòria de sa musca macedda fiat bera. Apustis iat detzìdiu de nci provai su pròpriu.

E fiat stètia una faddina! Iat abertu sa carrada anca ddoi fiant is muscas, chi si ndi fiant scidadas e iant inghitza a bolai a muntonis, e su cielu si fiat fatu nieddu. Nemus bessiat prus de domu poita timiat de essi stampau de sa musca, e iant abandonau su sartu e is pascimentus. Ita disgràtzia manna, nudda podiat firmai is muscas, ni is pregadorias, ni su fogu e ni su velenu. Is bividoris de Ludoverre, disisperaus, iant decìdiu de perì agiudu a un' òmini chi fiat nomenau po essi unu cogu. Issu biviat me in monti, anca non nci fiat musca ca ddoi fiat frius meda.

S'òmini iat detzìdiu de ddus agiudai, ma depiant inghitza a crei in Gesù Cristu. Fatu s'acòrdiu, su cogu fiat calau a bidda. Iat nau a totus de bessiri de is domus e de ascurtai cussu chi naràt issu. S'intendiat de atesu su sonu malu de is muscas. BZZZZZZZZZ.

Po unu gredu, s'òmini puru iat timiu, pentzendi a cali sorti mala iat a ai fertu sa bidda.

Apustis iat nau: sighei-mi-dda! Caminai unu a palas de s'àteru e ponei is peis anca ddus pòngiu deu. Andaus faci a sa pratza de sa bidda.

Totus passillànt a trassa de zombie, s'òmini ddus iat fatus ponni in circu, e totu sa pratza fiat prena.

E ita depeus fai, su ballu tundu? Preguntàt sa genti. Non fiat cussu su tempus de si ponni a baddai. Is muscas fiant boledi sèmpiri prus acanta de sa bidda, su cogu iat nau una preghiera chi si fiat imbellau in cussu gredu:

Deu aintru, tui a foras, malus annus e malas oras. Cuaddu biancu cun èqua niedda, àrgia mala cun musca macedda. Deu aintru e tui a foras, malus annus e malas oras.

E fiat acuntèssia una cosa mai bida: una musca ndi fiat arruta de celu, scuartarada in terra. BOM! S'òmini iat tzerriau a sa genti de non segai su circu. A pustis ndi fiat arruta àtera musca, e àtera ancora, totu sa scusurra, fintzas a candu in su celu non nci fiat prus nudda e si fiat pulliu comenti in una dì bella de istadi. Aaaaah. Totus fiant prexaus, calincunu nci fiat arrennèsciu a bociri cussus baballotis ferocis. Ma non fiat ancora spaciada, nci fiat ancora musca meda. Su cogu iat fatu fai fogus mancus po abruxai totu sa musca chi ndi fiat arruta de celu, apustis iat nau:

-Amigus mius, custu baballoti est arribau poita non credeis in deus.

-No est deus chi s'at puniu! lat nau

un'òmini. – Unu de nosu at circau de ndi furai su scussòrgiu de su Nuraxi de Moni de Jana e invecias at scapau sa musca agordadora.

Su cogu iat nau:

-Chi est de aici, tocat a torrai a cassai totu sa musca e a dda ponni me in is carradas. Preparai is carradas de ferru e linna, deu apu a pigai sa musca po dda torrai a serrai aintru. A pustis portai is carradas in su Nuraxi e ddas eis a lassai ingunis po sèmpiri! Po arregordai a totus is òminis ita acuntessit candu si circat de ndi furai unu scussòrgiu antigu.

E aici iant fatu. S'òmini iat nau àterus fueddus in una lìngua strambeca, chi bo, non comprendiat nemus. Sa musca arribat de totu s'isula. Musca a miliardus, lègia lègia, chi fadiat unu sonu de inferru: BZZZZZZ. Oiamomia ita arroi! Su cogu ddas iat acogadas tzerriendi: “MUSCA DORMIENS NUMQUAM TITILLANDUS”!

Sa musca nci fiat intrada me is carradas
e is òminis ddas iant serradas po ddas
portai me in su Nuraxi. E funt ancora
ingunis aintru, cuadas, impari a totus
is scussòrgius.

Duncas, imoi chi sciis sa stòria, no
andist a furai is cosas de is àtrus, no
ddu fatzast, po su beni de totus. Est
mellus a bivi pòburu ma sanu. E candu
intras in unu Nuraxi, lassa totu
comenti dd'as agatau.

Poita chi aberris sa carrada sbagliada,
ojamomia, sa musca iat a pòdiri torrai
a bolai prus mala de primu. E cussu
cogu, non nc'est prus po s'agiudai, e
is preghieras suas, a dolu mannu,
non serbint prus.


BZZZZZ.

Oh, abeta, ddu intendis tui puru custu
sonu?

BZZZZZ.

No! Firmati-dda. Dd'as intèndiu tui
puru cussu soni? No, firmati-dda. No
aberras cussa carrada. Nooooo!!!

BZZZZZZZ
BZZZZZZZZZZZZZ
BZZZZZZZZZZZZZZZ





COMUNU DE GONNOS

PROGETU IMOI ETOTU

PROGETU FINANTZIAU CUN SU DINAI DE SA REGIONE AUTÒNOMA DE SARDIGNA
CUNFORMA A SA L. 482/99 E A SA L.R. 22/2018

